

Masjid jadi pusat aktiviti kanak-kanak

KUALA TERENGGANU - Masjid Al-Muktafi Billah Shah (MAMBS) Ladang, Kuala Terengganu menjadi perintis menyediakan kemudahan pusat aktiviti kanak-kanak (Qismul Aulad) sebagai pusat penempatan sementara ketika ibu bapa mengerjakan solat tarawih.

Pengerusi MAMBS, Datuk Wan Mohd Albakri W Md Noor berkata, dengan inisiatif itu, ibu bapa boleh bertarawih dengan tenang dan tanpa gangguan anak-anak kecil apabila mereka dijaga dengan baik oleh sukarelawan berkenaan.

"Program ini sudah diperkenalkan beberapa kali sebelum Ramadan lagi, terutamanya apabila terdapat program ilmu seperti kuliah Isyak dan tazkirah yang melibatkan penyertaan ibu bapa yang mempunyai anak kecil, khususnya pada waktu malam serta hari minggu.

"Jadi pihak pengurusan masjid menyediakan bilik khas sebagai pusat aktiviti kanak-kanak dengan bimbingan sukarelawan masjid. Ia sangat memberi kesan positif dan sambutan baik di kalangan ibu bapa kerana mereka tiada apa-apa alasan lagi yang menghalang untuk beribadat dengan khusyuk serta menimba ilmu aga-

ma," katanya.

Program itu diuruskan sekumpulan sukarelawan masjid dari kalangan pelajar perubatan Universiti Sultan Zainal Abidin (Unisza) dan Hospital Sultanah Nur Zahirah, serta diselia golongan profesional termasuk arkitek, pakar motivasi serta kaunselor bermula jam 8.30 malam sehingga 10.30 malam, sejak awal Ramadan.

Sehingga kini, ia disertai seramai 30 hingga 40 kanak-kanak berusia tiga hingga sembilan tahun termasuk kira-kira 20 daripada mereka adalah peserta tetap.

Menurutnya, sukarelawan akan merancang serta melaksanakan pelbagai aktiviti berdasarkan kepakaran masing-masing seperti mewarna, melukis, permainan minda, kraftangan dan sesi bercerita yang mampu merangsang minat kanak-kanak supaya leka dengan aktiviti sehinggalah ibu bapa mereka selesai menunaikan solat tarawih.

Beliau berkata, bukan sahaja sepanjang malam di bulan Ramadhan, pihaknya juga membuka pusat aktiviti itu pada majlis dan program agama yang lain pada waktu siang termasuk bersempena majlis tadarus serta Nuzul al-Quran pada pertengahan Ramadan ini.



Antara aktiviti pusat aktiviti kanak-kanak (Qismul Aulad) sebagai pusat penempatan sementara ketika ibu bapa mengerjakan solat tarawih.